

四庫全書

集部

欽定四庫全書

古穰集卷十

明 李賢 撰

神道碑銘

特進榮祿大夫右柱國太保成國公追封平陰
王謚武愍神道碑銘

帝王有天下者必藉武臣運謀宣力以成大業而報功
之典未嘗嗇焉有與之誓曰黃河如帶泰山如礪國以

永存爰及苗裔望其悠久同休之意何如哉考其子孫不一再傳而國已絕者十常六七非報功之典異也顧其立功有厚薄而子孫之傳亦有久近之不同焉我太祖高皇帝創業功臣不為少矣子孫至今不衰者惟中山黔寧兩王家故存洎夫太宗文皇帝靖難功臣尤盛而元勛上公子孫能繼者亦惟平陰王一門而已王姓朱諱勇字惟貞世家鳳陽之懷遠祖諱亮當元之末天下土崩從高皇帝起兵屢立戰功至武毅將軍燕山中

護衛千戶考諱能從文皇帝靖內難功第一封奉天靖
難推誠宣力武臣特進榮祿大夫右柱國太子太傅成
國公永樂初佩征夷將軍印率師征安南未至沒於軍
追封東平王謚武烈詳見楊文貞公所撰碑王幼在醜
夷不與凡人伍出就外傅耻公子氣象不為惟淡薄自
處與韋布之士同讀書不事章句必求其要領於忠孝
之節義利之辨尤致力主師席者為之擊節嘆賞武烈
薨之明年遂嗣公爵恭慎益倍無一毫驕態見於言面

而敦厚簡靜之譽籍甚文皇帝大異之日加眷注巡狩北京必以自隨命掌都督府事留守南京王握兵訓練有法不怒而威時仁宗昭皇帝監國尤見禮重永樂十八年召至北京二十二年扈從文皇帝北征及昭皇帝繼統眷顧益隆左右股肱不二三人王巋然居其一未幾宣宗章皇帝臨御以王勛舊恩典有加宣德初漢王高煦謀不軌京師震動王密勸親征章皇帝用其策兵出近郊忽雷大雨作王知吉兆喜白於上曰天意有在

可不戰而克矣遂計日兼行師至其城漢王大驚不意
上親征而兵至之速也即日出降罪人既得乃班師而
運贊之功在王居多賚予極厚三年隨章皇帝北征以
功加太子太保命總京營兵王益殫心以副委注兵威
大振五年王以南北兩京及緣海陝西諸軍京操漕運
遠近相乖請以南軍漕運北軍京操緣海陝西諸軍還
戍上從之人以為便自是每歲巡邊謁陵必命王綜理
留務六年冬王以京營兵分往大同諸路防守者多恐

非居重御輕之意上以為然乃命兵部選精兵十萬以益之七年上慮勲臣子孫過於優逸後不堪事自公侯以下皆屬王督練之時宣府諸軍勞民供餉王請屯田以息轉運又請留宣府諸軍之備邊者九年扈從巡邊慨然欲選將士長驅直入以殄之會北敵自殘其帥阿魯台部落離散多相率歸順者遂還師十年正月今上皇帝嗣位王宿衛禁闈久之尋命兼知經筵事仍總兵而以為天下雖安不可忘戰復奏選銳兵四萬以備邊

正統改元之秋上敕王教勲臣子孫王於是親為講解
經史大義後多成才者四年授特進榮祿大夫右柱國
九年邊報有警王率兵出喜峯口敗敵於富裕川追至
熱水川獲人馬駝羊而還以功進太保尋賜蟒龍衣十四
年敵帥額森大舉入寇王復帥兵扈從親征還至土默特
不意敵衆來襲進逼宣府上命王提兵四萬以禦之至
雞鳴山軍未及陳敵伏四發王遂力戰以死是年八月
十三日也距生洪武辛未七月二十二日壽五十有九

天順改元上復登大寶重念昔者死事之臣下詔追封
平陰王謚武愍命有司治墳於武烈王墓側以爪髮衣
冠葬焉仍遣官諭祭立碑神道命臣賢撰文以賜之王
立朝四十餘年小心謹慎未嘗一日廢朝謁脩幹魁顏
虎目虎吻髮髯蝟張望之森然氣欲搏人然寬衣博帶
儀若偉儒至待搢紳之流則謙恭自卑和氣可掬遇士
類之貧者務在獎濟得所而後已兵士得其撫恤莫不
樂為之用凡天文兵法騎射劍槩之藝咸底於精性至

孝先王違世時年尚幼居喪哀毀人不能堪而事母尤
極榮養嗚呼王於忠孝已用其情俯仰之間可謂無憾
者矣配王氏都督官同之女封成國夫人子男二儀嗣
公爵佶指揮使女五長適泰寧侯陳瀛次適都督郭震次
適彭城伯張瑾次適武功中衛指揮韓銘次幼在室銘
曰有廟需梁有身需股賴其力焉孰敢予侮我弓爾張
我矛爾揚捐軀之志畢竟以償矯矯平陰元勲之胄克
世其勲家聲益茂事我列聖屢効勤勞心膂之寄恒總

節旄匪帝私王人惟求舊上公寵榮孰在王右元德偉
烈著於盛時忠孝大節展也無虧惟帝念功聿崇報典
堅珉有辭百世不顯

奉天靖難推誠宣力武臣特進榮祿大夫柱國
太保寧陽侯追封濟國公謚武靖陳公神道碑
銘

永樂初靖難功臣不下數十人然克享祿位於悠久者
鮮矣惟太保寧陽侯陳公歷事五朝出藩入衛凡六十

餘年而以令終嗚呼盛哉公諱懋字舜卿鳳陽壽州人
高祖萬曾祖福三祖大一俱追封涇國公妣皆涇國夫
人父亨從太祖高皇帝定天下以功陞都指揮使洪武
三十二年從太宗文皇帝靖內難復以功進都督同知
卒贈奉天靖難推誠宣力武臣特進榮祿大夫柱國追
封涇國公謚襄敏母韓氏涇國夫人襄敏公三子長恭
嗣為都督同知次忠府軍前衛指揮使季即公也器宇
宏遠識見超卓尤負膽氣工騎射年弱冠即從父領兵

為前行凡壩上廣昌蔚州大同白溝濟南之戰與父同
功又禦敵於單橋藁城西寨東平固鎮小河戰尤力累
陞右都督永樂初論功行賞進封奉天翊衛宣力武臣
特進榮祿大夫柱國寧陽伯食祿一千石子孫世襲賜
誥券賚予甚厚六年受詔佩征西將軍印總兵鎮守寧
夏賜寶鏹白粳牛羊以為戒嚴之費公至鎮號令一新
凡邊人降附者親撫綏之務得其歡心乃已七年選精
兵自將大敗之於境外由是敵衆遠遁邊塵為之一清

捷聞加封奉天靖難推誠宣力武臣特進榮祿大夫柱
國寧陽侯食祿一千三百石子孫世襲復賜誥券及貂
蟬冠服錦綺寶鏹八年春上親征北敵公將左掖兵十
一年冬還鎮十二年春上復親征公仍將左軍俘馘甚
衆明年還鎮十四年夏有報敵帥瑪哈穆特死者公未之
信曰是欲懈我邊備也即申飭諸將固守已而敵衆果
來見有備而退二十年春上復北征公率所部兵以從
還京賜玉帶金綺龍衣且聞公有女賢淑禮聘入宮冊

封麗妃尋命歸寧父母賚予駢蕃當世無與為比二十一年詔公統陝西寧夏甘肅三鎮兵出勦強敵公率眾直抵賀蘭山所向無前盡收其隊長額森圖罕部落及其牛馬駝羊數萬凱還上大悅寵賚有加二十二年復隨上北征師還以公為殿至京遂領前軍都督府事仁宗皇帝登極以公勲戚有勞加太保復官其長子昭為勲衛宣宗皇帝臨御待公尤厚樂安州之平公領京營兵衛上有功還有金帛人口之賜二年復鎮寧夏三年

春奏徙靈州城以便防守四年春得黑白二兔以進上
賜璽書獎諭兼有玉帶龍衣馬圖之賚六年還京十年
命佩平羌將軍印移鎮甘肅正統改元今上皇帝嗣位
念公勲戚之舊召還奉朝請十三年冬福建民鄧茂七
作亂偽稱閩王勢甚猖獗上曰此賊非老將不能平特
命公率師往討之至浙江有欲分兵先守海口者公曰
如此是絕其生路則為死寇矣不從明年春師次建寧
有欲屠沙尤二縣者公曰如此則益堅賊心矣乃下令

諭之俾各復業能斬賊首者官賞與王師同於是降者日衆公曰賊勢已孤無能為也乃五路進兵一鼓而收之凱還賞勞加等命領中軍都督府事尋兼領宗人府事景泰中加太子太師天順改元皇帝復位恩遇益隆固辭官師許之六年春忽得疾踰秋不能起上言臣老死不足恨惟陛下以生民為念任賢用能以圖太平之治則國家幸甚上覽之惻然曰看卿所奏足見忠誠宜尚加調治以副朕懷久之醫藥弗效遂薨時天順癸未

七月十六日也距生洪武乙未二月九日享年八十有五
五訃聞上震悼輟視朝一日追封濟國公謚曰武靖遣
官諭祭加賻及營葬事東宮及諸王亦各致祭公偉觀
脩髯語音洪亮胷懷磊落敬禮文士雖位極人臣未嘗
妄自尊大而南征北伐口不言功當為中興名將稱首
配嚴氏封寧陽侯夫人早卒子男六人長即昭次曰福
寧俱早卒次曰晟為勳衛次曰潤次曰瑛次曰昂女五
人長適應城伯孫傑次即恭順榮穆麗妃次適東勝右

衛指揮使張昭次適府軍左衛指揮使張輪次適都督同知馬良潤等卜以是歲某月某日與嚴夫人合葬於都城西香山之原銘曰壽有陳宗父子傑特涇公濬公後先開國文皇靖難孰多勲勞涇公輔之首秉節旄奮武桓桓所向披靡大事垂成星殞於壘濬公承之以篤世忠鼓勇前馳涇公是同躍馬揮戈到處喋血乃伯乃侯成此茂烈金符虎節屢鎮邊陲于征于狩無遠不隨閩寇勦東南震恐濬公征之遂輯其衆巍巍勲戚歷

事五朝龍衣玉帶惟帝之褒壽嘏既經允顯六紀容與
承平宿將無幾煌煌愍冊賁此令終生死哀榮孰如濟
公西山嵯峨佳城在側史臣勒銘千載輝赫

奉天靖難推誠宣力武臣特進榮祿大夫柱國
豐城侯追封茂國公謚剛毅李公神道碑銘

公諱彬字文質姓李氏鳳陽定遠人父信善騎射少從
太祖高皇帝征伐以戰功累官明威將軍濟川衛指揮
僉事後以老疾致仕公方弱齡補父官即如老成人上

下交譽之洪武庚午率所部兵從穎國公征北敵歷朶
顏鴉兒諸山追襲敵帥阿咱爾實哩至洮兒河獲人馬數十
復歷黑嶺寒山諸處至熊皮山追襲敵帥烏梁海時太
宗文皇帝居潛邸聞公智勇深嘉賞之明年遣公巡視
宣府興河保安隆慶懷來諸邊城尋以公父信為遼東
都司都指揮使癸酉命公率兵築宣府德勝口城巡視
邊關明年復命公率兵築萬全懷安城又明年命公率
兵征哨泥河營黑松林諸處至哈刺之地乃還敵衆遠

道庚辰文皇帝舉兵靖難命公率兵攻薊州遵化克之
以功陞指揮同知又攻雄縣莫州克之陞都指揮僉事
復克大寧城又克敵於鄭邨壩克廣昌蔚州大同諸城
明年夏於白溝河大戰以功陞都指揮同知進克滄州
壬午於滹沱河單橋藁城諸處克敵追至彰德出哨定
州陞右軍都督僉事又於楊村交戰被鎗上命遣醫視
之賚予優渥俾還北平公奏曰臣本戰士豈以微傷自
餒願隨軍効犬馬之力上不允命輔世子守城癸未命

公率兵護中宮至京師永樂甲申上以四方既平乃論
功行賞念公之勞居多封奉天靖難推誠宣力武臣特
進榮祿大夫柱國豐城侯食祿一千石子孫世襲自是
委托益重乙酉命鎮江西丙戌命巡皂君山丁酉命征
交趾有功加祿五百石乙亥勅平東海倭寇庚子督操
江尋命往長沙討賊李法良獲之辛丑命捕福建海寇
癸卯命佩征遠前將軍印總兵守甘肅大振軍威敵衆
龍奮丁未隨駕至京命佩征夷將軍印總兵守交趾遠

人莫不仰德畏威南陞晏然在鎮六年以疾卒時永樂二十年正月十五日也交人莫不罷市巷哭其德澤及人深矣訃聞上為之震悼輟視朝一日加賜賻儀追封茂國公謚曰剛毅遣官諭祭復追封三代祖考皆上公妣皆公夫人敕葬宛平縣西安里之原蓋四十有四年於今矣配某氏累封公夫人子男四人長曰賢故嗣封豐城侯次曰芳次曰恭次曰禎女二人長適彭旭次適豐潤伯曹義孫男二人長曰勇今嗣封豐城侯次曰鉞

孫女二人長適指揮戴瑄次適都督子陳珣嗚呼公以武士遭遇龍飛之運乃能建勲庸胙茅土東征西討迨無寧歲可謂國之勞臣矣是豈可以不銘輒因勇之請序而銘之銘曰桓桓李公慶時之逢奮武揚威克効其忠統其父兵所向無敵長驅敵場左右搏擊邊塵既清武備是營飭彼邊城大振軍聲靖難之師惟公義勇奉戴真人不震不悚通侯之爵帝寵是加世澤之延與國無涯公復何心殫其智力奉命周旋曾不少息或鎮邊方

或殄強梁意氣之盛泰華軒昂終於炎荒葬於畿土史
臣勒銘光照千古

推誠宣忠翊運武臣特進榮祿大夫柱國會昌
伯累贈奉天佐理推誠宣力武臣特進光祿大
夫右柱國太傅安國公謚恭憲孫公夫人董氏
合墳神道碑銘

我國家制度文為迴超前古凡勲舊大臣生榮死哀之
禮務極詳備至於外戚之賢者待之尤極其厚蓋天理

人情之至誠不可得已者然亦不多見焉今見太傅安國孫恭憲公一人而已公聖烈慈壽皇太后之父也距薨已八年而夫人董氏卒訃聞宮庭哀悼上輟視朝一日凡白金寶鏹布帛之類祭葬之禮率異常例既襄事復命臣賢為撰合葬神道碑銘用昭公與夫人善行於來世嗚呼休哉公諱忠字主敬姓孫氏世家濟南之鄒平高祖而上代有顯宦曾祖七翁祖復初父士英俱不仕以公貴皆追封會昌伯曾祖妣張氏祖妣高氏俱贈

夫人妣丁氏封太夫人公自幼端重祖父母尤鍾愛之嘗相謂曰此兒風骨不凡必大吾門者惜吾輩不及見也一日忽患喉腫氣塞舉家驚救無措是夜父夢神人曰上帝鑒汝陰德命吾醫汝兒汝毋恐覺聞公口果有藥香病遂愈嘗與里中羣兒嬉戲公獨自重餘皆呼呵擁護見者異之曰此貴兆也稍長知向學乃選入邑庠即力學不怠久之入貢太學聞見益廣洪武己卯擢山西介休簿邑素號難治令丞已為豪橫所梗公至凡不

率者悉置諸法不旬月政聲大振尋以外艱去服闋調河南永城時營造天壽山陵寢公率邑夫赴工撫恤惟周他邑夫多亡去公所部者俱存督理總戎嘉其能召與計事凡所需悉以委公事竣內補鴻臚序班時宣廟為皇太孫將議婚仁宗昭皇后之母太夫人知公第四女有淑德太宗文皇帝特遣彭城伯張景奉太夫人之永城選至京立為皇太孫妃洎宣廟踐阼冊為貴妃陞公驃騎將軍中軍都督府都督僉事賜宴并錦袍犀帶

宣德丁未今上皇帝誕生冊貴妃為皇后越三年進封公推誠宣忠翊運武臣特進榮祿大夫柱國會昌伯食祿千石子孫世襲復賜誥券追封三代遣公還家燎黃以中官隨行仍幸其第慰問甚至未幾太夫人卒公乞奔喪復遣中官督葬事又嘗念公居第湫隘欲命工撤而新之公懇辭曰自臣視之已為寬矣勞人費財非臣所安也遂止公嘗語諸子曰吾家幸居戚里富貴已極爾等宜知止足庶足以保名位諸子奉教惟謹公天性

樂善好義鄉人有鰥而謫戍者賙之不倦及卒葬以地
有罷職而不能舉喪者助之棺衾而恤其家有受誣而
謫戍者力為伸雪薦用之有左遷嶺廣囊無一錢者贐
以金有坐受賕而貧無貸者為償以其數有遺女無依
者備妝奩以嫁有罷爵乞腴田者推以與之有蒼頭詐
取人財者代償而遣之歸凡善行不可勝紀忽疾作朝
廷命醫往治不效疾亟謂諸子曰吾起寒微不自意姻
婭戚畹身都顯爵實出望外奈何起家難保家不易汝

輩勉之言畢而逝在景泰三年九月十七日距生洪武
元年七月三日享年八十有五朝廷聞訃敕有司營葬
於宛平縣西香山之原追封會昌侯謚康靖天順改元
皇上復位首念公復追封奉天佐理推誠宣力武臣特
進光祿大夫右柱國太傅安國公改謚恭憲夫人董氏
加封安國夫人夫人諱元貞公同邑人父彥恭母齊氏
皆邑之好善家夫人自幼莊重寡言既笄歸公闔家宜
之及公為邑庠生夫人同其清苦佐以勤儉公歷邑簿

夫人與俱凡服御如韋布妻未嘗有所增益有饋物者必嚴拒之用是公有冰蘖聲而夫人家範益肅既封夫人常被召入內小心慎密未嘗一語及外事出則未嘗一語及內事雖賚予駢蕃若不與者凡公賙貧恤孤施予之際夫人未嘗不極力贊之至於兩嫁孤女夫人之力尤多而待媼族御僮婢一于恩惠每遇歲時集子孫于前諄諄戒諭謂貴而能謙富而好禮乃處已良法公沒之後有欲以烈禍中公家者事勢洵洵夫人教諸子靜

以守之卒消其變天順以來夫人壽益高福益備子孫
益盛而朝廷篤念外戚之意益厚一門榮顯前代無比
已而遘疾上命醫往治遣中官問安相屬於道既愈復
作至彌留乃召諸子囑之與公治命一同夫人生於洪
武二年七月十七日卒天順四年四月四日享年九十
有二卜以是歲五月十五日啓公之窆而合葬焉子男
五人長繼宗嗣會昌伯以翊戴功封侯次紹宗顯宗俱
都指揮同知次續宗都指揮僉事次純宗錦衣衛指揮

僉事女九人皇太后居四長早卒次適陳禮次適張雄
次適王希用次適光祿寺丞朱壘次適朱能餘在室孫
男十人璉錦衣衛指揮僉事瓚珍玗璘理瓏瑀俱錦
衣衛千戶孫女十人八適人餘幼曾孫男六人女四人
為之銘曰戚里之貴歷世攸崇夷考其行鮮克令終惟
恭憲公迴出倫類懿美夫人德罔不脩篤生聖母永祚
邦家惟功之盛浩浩無涯公復何心汲汲行善調貧恤
孤曾不少倦夫人之志惟公是同一念之善樂之無窮

自天祐之吉无不利慶鍾一門天也何意金蘭玉樹盈
于庭階簪組輝耀惟義是諧公目雖瞑公心則慰厚澤
綿綿雲仍曷旣恩典之隆曠世之逢用全始終式昭至
公峨峨翠珉刻銘載實億萬斯年安此泉室

恭順侯追封涼國公謚忠壯吳公神道碑銘


天順辛巳逆賊曹欽謀為不軌潛俟七月二日早朝入
內為亂恭順侯吳公先於是夜一鼓聞之即與其弟廣
義伯琮約總兵懷寧伯孫鏜走詣長安門告變於是禁

門不啓賊計遂窮舉火燒禁門公等率兵勦殺奮不顧身賊雖誅滅公已捐軀矣嗚呼先機告變公之忠也殺賊喪元公之勇也然則逆賊之敗豈非公之功乎皇上聞公之沒哀悼殊深輟視朝一日追封涼國公謚忠壯凡祕器諭祭賻儀之類悉從厚典復命有司為營塚壙以安葬之蓋痛念勲戚之臣為社稷而死故報功之典倍徙尋常也既而琮詣予泣且告曰先兄不幸沒於鋒鏑茲欲立石墓前以白於世非先生之文不可辭弗獲

按通政司參議趙君昂之狀公諱瑾字廷璋其先西涼人祖諱允誠永樂中累以戰功封恭順伯父諱克忠嗣伯爵洪熙初以戚里恩進封恭順侯正統甲子以征敵功加太子太保己巳秋禦敵北邊力戰而死追封邠國公謚壯勇母楊氏封邠國夫人叔父克勤官至左軍都督府左都督亦同兄沒於陣追封遵化伯謚僖敏公生而英銳襟度爽闊親賢好善未嘗以門第驕人以故搢紳士大夫樂與之游相與議論古今講說道義而公頗

能識其旨趣尤閑武藝精騎射方其父叔禦敵之際公亦在陣中發矢射敵洎父叔矢盡而亡公始就執其酋長念公忠義之後釋之乃還京遂嗣父爵天順改元皇上復位公以勲戚隨侍應對稱旨自是日備顧問賚予甚厚尋命理左軍都督府事公益感激夙夜效勤一旦遭變委身則其允蹈忠義視乃父乃叔為無愧矣公生於永樂癸巳十二月一日享年四十有九配李氏故會寧伯之女有淑行封侯夫人生子男三長曰鑑次曰鏞

次曰錫女一適指揮使劉王琮嗣廣義伯遵化公之子
卜以是年八月某日葬公於順天府房山縣之新莊從
先兆也銘曰世祿之家忠義無幾有若吳門展也無比
彼美忠壯虎視眈眈遵化之姪邠公之男忠以捐軀壯
以禦侮相繼如歸光照中土飭終追榮惟帝之恩匪帝
之私惟以報勲闡矣泉宮西山之麓秘器旅陳穹碑載
陸仁者有後公則成仁銘以貞之何千萬春



古穰集卷十

欽定四庫全書

集部

古穰集卷十二

詳校官編修臣翟槐

中書臣劉源溥覆勘

總校官原任中允臣王燕緒

校對官中書臣李棻

謄錄監生臣官懋弼

欽定四庫全書

古穰集卷十一

神道碑銘

奉天翊衛推誠守正文臣特進光祿大夫柱國
兵部尚書靖遠伯追封靖遠侯謚忠毅王公神
道碑銘

本朝之制文臣不許封爵邑惟有武功者不在令自洪

武以來蓋百年於茲矣文臣有武功而封爵邑者始一人焉靖遠伯王公是已嗚呼休哉公諱驥字尚德系出太原先世有宦遊雲中者因家宣寧高祖而上多顯仕曾祖守道祖思宗仕元為高陽令有惠政父成適元季兵亂因徙家東鹿娶程氏生公公自幼警敏年十三入邑庠為諸生即有遠大志未幾父母相繼以沒公哀毀盡禮能自樹立遂領鄉薦登永樂丙戌進士第授兵科給事中尋出使山西見徐溝民困奏免鹽池虧課二十

餘萬時應天府缺丞務急且冗委公署之立辦復署行
在都察院事持正不撓陞山西按察司副使洪熙改元
仁廟素知公才召為順天府尹畿甸大治特賜誥以褒
之宣廟即位之明年陞行在兵部右侍郎時慮南京根
本重地真定州畿內要衝秦蜀二王府護衛兵多兩遣
公分調屯駐公皆處之得宜宣德乙卯進兵部尚書先
是敵帥阿勒坦多爾濟巴勒軍橫于塞下今皇上即位之
明年特遣公往視師許以便宜行事公至見沿邊城堡

不堅將無紀律嘆曰邊防如此宜乎敵至翊日大集官
兵問曰往年出兵遇敵於魚兒海首先退縮者為誰咸
曰都指揮安敬即命左右引出斬之一軍為之股慄又
誓於衆曰自今遇敵有不前者罪亦如之號令一新兵
威大振既而敵帥巴圖博羅入侵莊浪公即遣都指揮
魏榮授以方略率兵勦之遂擒其部落以還敵始知懼
遁走公閱甘涼軍冗曰兵貴精強乃退其三之一八月
還京上慰勞者久之敵聞公還復入侵上復敕公往公

至遣大將蔣貴率精騎數千出境且戒曰遇敵不捷無復相見也再遣偏將趙安率兵繼之公與太監魯安都督任禮分兵為殿遂擒阿勒坦俘殺所屬幾盡邊境底寧捷聞上遣人賚金幣勞公加兼大理寺卿明年還京先是雲南麓川宣慰使思任發叛累征不利辛酉春復以蔣貴率諸道兵往討之仍命公總督軍務賜以明鎧雕弓蟒龍緋袍以壯其行公至聞賊在大候州即遣都指揮馬讓授成算以往斬首數百級餘賊遁去是歲冬分

道並進會于上江以夾攻之因風縱火斬獲無算賊首
父子僅以身免遂盪平其巢寨捷聞降勅獎勞召公北
還時蠻賊韋郎羅造釁於維摩州公遣指揮萬誠先聲
率土兵討之賊潰散郎羅逃之安南復傳檄諭之邊人
遂斬其首來獻廣南富州土官儂郎舉沈政讎殺十餘
年公宣諭朝廷恩威兩讎頓釋至京上親宴于奉天門
文武官僚以次陪宴士林榮之論功封公推誠宣力武
臣特進榮祿大夫柱國靖遠伯食祿一千二百石特賜

誥券追封三代曾祖考皆如其爵妣皆伯夫人未幾思
任發竄入緬甸謀復叛上召公曰勞卿再一行耳公復
總諸軍至金齒遣人促緬甸送思任發至軍前緬人佯
諾不遣公曰緬人黨賊不可不加兵乃至騰衝分為五
營公與蔣貴及都督沐昂分督以進木邦宣慰使統兵
萬餘駐於蠻江許觀我軍容公責以忠義賞以牛酒遂
感悅而退緬人擁衆大至公密令貴率兵匝江而下焚
其舟數百艘大戰一晝夜賊潰遁去捷聞上召公班師

慰勞益厚加祿三百石壬戌秋北敵近邊上復命公出
巡仍許便宜行事乃自寧夏抵甘肅凡寨堡烽堠悉增
脩之仍授邊將以破敵及練士方略事竣還京麓川遺
孽思機發思卜發復據孟養以叛戊辰春上復命公總
諸軍率兵往討之至金沙江賊於西岸立柵以拒公伐
竹為梁麾兵悉渡一鼓破之賊又於鬼哭山巔立柵公
與偏將親冒矢石往拔之二孽死於亂兵南服遂寧景
泰初都督宮聚征湖貴苗賊失利乃以公佩平蠻將軍

印代總其兵遂大破苗賊獲其酋偽稱剡平王苗虫富
檻送京師餘寨悉平振旅而還復增祿一百石子孫世
襲尋委公總督守備南京壬申秋以衰老乞閑還京天
順改元皇上復位思用舊人召公慰諭良久賚以白金
文綺顧公精力尚健復拜兵部尚書再閱月兵政漸有
次第而公固辭不可強矣上亦念公重違其請令朝朔
望復賜誥加號奉天翊衛推誠守正文臣特進光祿大夫
禮遇甚厚天順四年五月十一日以疾薨於正寢公天

資通敏遇事敢為正色立朝欲以身殉天下每陳國家利害生民休戚辭氣懇切孜孜不已襟懷開爽好賢樂善人有寸美必極口稱道見人材沈滯必拔起任用始終成就之未嘗有德色與人交不立崖岸循循和易雖位兼將相望重累朝曾無一毫驕矜之意見於顏面體貌清癯風儀俊整尤善談論見者為之懽然當大事屹若砥柱之在中流功名事業視前古為無愧矣疾亟家人皆惶懼公曰古人以死為歸何至是邪且對故人大

理卿龔永吉敘間閣神思如常容甫出門公就席而逝
享年八十有三上聞訃哀悼輟視朝一日祭葬賻儀悉
從典禮追封靖遠侯謚忠毅士大夫莫不茹泣相弔公
娶張氏累封伯夫人生子二曰玉瑤俱早卒側室劉氏
生子二曰瑞嗣公爵曰珩為勲衛孫男二女二卜以是
年七月吉日歸葬於東鹿祖塋之右銘曰天生豪傑作
我邦家大其抱負弘彼聲華乃若斯人世豈多有乃鳳
乃麟出也非偶惟忠毅公間氣所鍾紛紛茅葦挺見孤

松早奮於岸入奉廷對羽儀公朝展也無愧歷試繁劇
如劔斷犀佐持憲節名震山西召尹京畿畿內安堵貳
我夏官折衝樽俎進大司馬出巡邊陲斬其怯將大振
兵威于甘于涼于彼沙漠矯矯勁敵罔不就縛麓寇弗靖以
跳以梁公來督戰如鷹之揚殲厥渠魁盪其巢穴滇南
之境遺患斯絕報功有典迴出羣流河山帶礪與國同
休將相之才一代之望壽考哀榮孰與公抗束鹿之原
卜此牛眠豐碑有銘百世之傳

奉天翊衛推誠宣力武臣特進榮祿大夫柱國
南和侯謚忠襄方公神道碑銘

公諱瑛字某姓方氏世居滁之全椒曾祖銘洪武中驍
將也官至留守衛太平門百戶祖信繼以戰功陞濟陽
衛千戶父政永樂中從文皇帝靖難累功陞左軍都督
府都督同知洪熙宣德間屢佩將軍印總兵鎮守交趾
開平大同正統初進右都督征麓川領兵深入援絕而
死追封威遠伯謚忠毅母陳氏繼萬氏俱封夫人公以

廕授金吾右衛指揮使論父死事功陞都指揮同知麓
川賊首思任發自忠毅沒後益肆猖獗辛酉春上命定
西伯蔣貴率師討之以公故將子嘗從其父領支兵殺賊
有膽氣且熟其鄉道俾與貴同事公以此賊實所不共
戴天者自誓必勦滅以復父仇師環其境提兵先登一
鼓而破之遂平其地還進都指揮使人皆嘆羨以為方
氏有子矣壬戌秋復從靖遠伯王驥征貢章沙坭阿嶺
諸蠻克之進後軍都督府都督僉事丁卯春朝廷以公

勇略兼人命充參將將兵鎮守雲南時賊子思機發復據孟養以叛公自將精兵擊走之獲其妻子象馬而還已巳夏師宗州羅羅賊首黑救番來等為逆公悉捕擒之還京進都督同知賞賚有加景泰初貴州東苗作亂圍平越興隆諸衛復命公將兵與兵部侍郎侯璉往解之遂生繫渠魁斬首無算進充右副總兵廷議以苗賊叛服不常必得名將以鎮之遂進公右都督總兵鎮守貴州明年征香爐山諸寨悉平之復進左都督癸酉冬

合四川兵勦滅草塘叛寇斬首七千餘級甲戌春大臣
有言公之將略堪掌禁兵者乃召公還俾分總五軍營
且論其前後平賊之功進封奉天翊衛宣力武臣特進
榮祿大夫柱國南和伯食祿一千石子孫世襲給賜誥
券追封曾祖銘祖信皆為伯爵曾祖妣某氏祖妣湯氏
生母黎氏皆為伯夫人明年專總神機營未幾銅鼓五
開諸苗復叛僉謂非公不能靖乃命公佩平蠻將軍印
總兵討之公至賊境獎勵諸軍指授方略克平四百餘

寨誅擒八千餘衆餘賊屏迹遂留鎮湖廣貴州威德並
行苗蠻聞風納款者甚衆天順改元進封南和侯明年
東苗酋長干把猪僭稱偽號據險為患公分兵進勦直
擣其巢穴破六百餘寨斬首一萬餘級俘獲八千餘人
械送干把猪至京斬之又明年出勦都勻等處克平二
百餘寨擒斬三千餘人惡黨殆盡餘皆竄伏內地悉平
議者謂自前平苗之功未有盛於公者朝廷方將論功
行賞而公一疾逝矣訃聞上深哀悼輟視朝一日謚曰

忠襄祭禮賻儀悉從厚典復命有司為營塚壙公生於永樂丙申某月某日卒於天順庚辰十月二十八日享年四十有五配劉氏封伯夫人子男二長曰毅次曰某寔公於都城西山之陽從吉兆也公天資英邁才識通敏凡古兵法雖皆精曉而行師制敵不祖故常運用之妙恒出人意是以所向克捷嘗疏練兵法及圖諸陣勢以獻上深嘉賞之其待裨將以誠撫士卒以恩接士大夫謙恭而有禮是以上下無不得其懽心者回視古之

良將豈多讓哉銘曰赳赳方公出自將門鍾氣之秀迥
然不羣帥其父兵庸以自効究厥所存惟忠惟孝既平
南徼復殄東苗威震殊方受帝之褒帝曰虎臣孰敢予
侮南顧無憂功邁爾祖左右股肱是託是膺委之重鎮
光此中興玉帶貂蟬金書鐵券報公之勲惟帝之眷公
本武臣有禮有仁過彼章縫盎然生春在古或難于今
乃見天不慙遺匪常斯變西山之麓有石我我有銘在
刻千載不磨

奉天翊衛宣力武臣特進榮祿大夫柱國南寧
伯追封南寧侯謚莊毅毛公神道碑銘

將臣子孫能繼前人之烈而益振之以大其功至於都
顯爵受重寄者必其才略之過人乃克能之若南寧伯
毛公其一焉公諱勝字用欽其先幽薊人曾祖教化在
元有功封畿寧王伯父曼濟官至太尉祖父拜布哈中
書右丞相父安泰國朝授昭勇將軍指揮使皆用公貴
追封南寧伯妣皆伯夫人公天姿剛毅風神俊偉有膽

氣善騎射於凡兵書悉通大義宣德辛亥以父廕陞都
指揮使正統辛酉從征麓川入其境賊酋力招漢伏兵
于路公將遊兵覘之射其象馬應手而仆遂敗其衆督
船濟江直抵其巢穴走其賊首思任發破寨而還以功
陞左軍都督府都督僉事明年奉勅充右叅將將兵復
征麓川公益思自效勇氣當百平其寨柵而繫其黨與
前後無算還進都督同知己巳秋大同有警公適以幹
當遇敵於道生致數人以歸尋復委公巡視邊城屢敗

其衆朝廷嘉其功進左都督復往紫荆倒馬諸關追殺敵衆累有金帛之賚是歲冬奉敕充左副總兵往征湖廣貴州苗賊凡下百十餘寨賊皆敗散景泰初重安江苗寇復叛總戎者有難色公慨然當之即以兵壓其境既與敵遇公獨發一矢中其酋而斃餘賊驚潰由是香爐山諸寨苗賊皆望風驚服生擒偽王韋同烈記哥等械送京師斬之西南夷之患遂息壬申夏朝廷委公鎮守雲南金齒騰衝諸處論功封奉天翊衛宣力武臣

特進榮祿大夫柱國南寧伯食祿一千石子孫世襲賜
以誥券追封三代公在鎮號令雖嚴而御軍撫夷率以
仁恕酋長聞風歸嚮無梗化者明年春將兵詣金沙江
械賊子思機發送京師又明年冬餘寇刀放革復叛勢
甚猖獗公率精兵突至騰衝賊不暇為謀遂生繫刀放
革餘衆悉竄伏事聞獎勞有加蓋倚賴方殷而公已邁
疾不起矣實天順庚辰八月十四日也享年五十有八
訃聞皇上震悼輟視朝一日追封南寧侯謚莊毅遣官

諭祭復勅工部為營葬事親王以下皆行祭禮公為人
孝友天成遇士大夫有禮謙恭自卑皆出於誠無一毫
虛假處宗黨之間上下稱道無異辭平生不事華靡早
有大志卒能償之可以謂之將才也已配白氏繼姜氏
皆封伯夫人生男曰榮嗣伯爵曰倫錦衣衛指揮使女
適都指揮僉事沈英其次男三曰俊曰傑曰信女一俱
側室出也孫男二女一榮與諸弟扶襯自金齒至南京
卜葬於靜明山高家庫之原從吉兆也銘曰嗚呼毛公

猗將之雄赳赳之資建此武功官以廕陞志乃自奮長
驅滇南敵無堅陣再征而捷帝曰汝嘉祿秩屢進賚予
頻加惟彼朔方邊塵忽警公往巡之敵迹斯屏苗寇有
作屬公徂征一矢中酋諸寨悉平遐邇南夷託公往鎮
遠人底寧不煩血刃繼爾前列益大其聲生有世澤沒
有追榮懿此將臣世濟其美堅石有銘終古無毀

奉天翊衛宣力武臣特進榮祿大夫柱國東寧
伯追封東寧侯謚襄毅焦公神道碑銘

公諱禮字尚節山後人曾祖噶沁祖克呼木父巴斯台以公貴贈東寧伯曾祖妣巴約特祖妣庫楚克妣伯特氏俱贈伯夫人公天資雄偉有智略善騎射累功至通州衛指揮僉事永樂初屢從太宗皇帝北征戰功居多宣德初以遼東密邇諸邊命公往守適與敵遇公當陣生致敵帥和斯巴勒餘皆潰散陞指揮使辛卯邊將以公才堪御衆薦陞都指揮僉事壬辰以征哨功進都指揮同知威名大振正統辛酉用都督曹義薦陞都指揮使壬戌

遼東邊事起公率兵禦之獲士馬甚衆癸亥朝廷嘉公
之能遣敕命守寧遠乙丑以公多邊功進僉左軍都督
府事仍守寧遠丁卯公率兵襲敗敵於境外以奇功陞
都督同知復有白金綵幣之賚己巳復襲敗敵如丁卯
獲馬牛軍器無算敕陞右都督充左副總兵白金綵幣
之賚甚厚景泰甲戌公復率兵對敵生致渠魁一人獲
牛馬尤衆進左都督天順改元英宗皇帝念公久於邊
遣敕封奉天翊衛宣力武臣特進榮祿大夫柱國東寧

伯食祿一千二百石子孫世襲賜誥券明年召至京師
慰勞之陞辭降敕獎諭賜蟒龍衣并甲冑諸物公至鎮
感上知遇益竭力邊事未幾以疾卒天順癸未正月十
四日也距生洪武壬戌五月五日享年八十有二訃聞
上震悼輟視朝一日追封東寧侯謚襄毅遣官諭祭令
有司營葬事公配程氏繼劉氏俱封伯夫人子男一曰
亮孫男四曰壽嗣封東寧伯曰俊曰傑曰仁孫女三是
年五月九日葬於順天府通州祖塋之次公平生尚氣

節識大義臨陣奮不顧身善撫士卒人人樂為之用以故所至成功敵人畏之時以比漢之飛將軍銘曰桓桓焦公際我明代展也長城橫亘紫塞公在東鎮帝顧無憂四十餘年礪爾戈矛獻馘之功幕府屢上閫外威名如古飛將帝念公功報典異常金書鐵券垂裕無疆壽考令終邊帥無幾帝恤公亡篤是恩禮勒銘於石百世不刊芳躅偉烈海內式觀

特進榮祿大夫征南將軍右軍都督府右都督

沐公神道碑銘

公諱璘字廷章姓沐氏別號繼軒故開國輔運推誠宣
力武臣榮祿大夫柱國追封黔寧王謚昭靖諱英之曾
孫西平侯謚惠襄諱春顯忠輔運推誠宣力武臣特進
榮祿大夫右柱國太傅追封定遠王謚忠敬諱晟駙馬
都尉諱昕之從孫黔國公謚榮康諱斌之從子特進光
祿大夫左都督追封定邊伯謚武襄諱昂之孫贈特進
榮祿大夫右都督諱僖之子也母顧氏鎮遠侯興祖之

女贈夫人公自幼穎敏不凡讀書日記數千百言舉動
遵禮如老成人十三喪父十五喪祖及母哀毀盡禮初
廢受父武略將軍千戶祿朝廷知其賢進襲祖明威將
軍指揮僉事正統戊辰時年十有八矣會孟養賊孽思
機發負固拒命而叅將方瑛都督張軌率兵討之公時
在行擐甲躍馬倚角進攻賊衆大潰思機發僅以身免
孟養遂平朝廷嘉其功遣使賚以白金綵幣進僉雲南
都指揮使司事練習戎務雖虜葺獷悍轆轤於前而威

令未嘗少阻景泰初榮康薨乃進公同知右軍都督府
事總兵繼鎮時多易公少年者後見公下令動中肯綮
老將宿校及藩臬舊臣無不凜然凡百廢墜以次脩舉
而城堡學宮尤加之意汰冗剔蠹撫軍簡僚靖邊足饋
德化大行越五年朝廷以思機發尚在屬公殄之衆議
欲深入公曰此釜中魚耳安能久乎若我軍深入徒冒
崖谷鎗研之險非萬全計也但以大軍壓境振我威武
懸重賞於軍中下檄書於緬甸內襲其穴外扼其吭擒

之如拉朽耳諸軍校皆曰善已而緬人果餌重賞獲思
機發并妻子以出乃檻送於京師朝廷大喜遣使勞公
白金綵幣之賚甚厚廣南酋儂胤榮叔姪為亂聚至數
萬人及木邦陶孟思指搆兵劫其長公皆遣兵受以成
算殲其桀驁而平其地雲南境臨廣西上林安隆有爭
占村甲者搆兵久而不息公遣使勸諭之二酋相謂曰
我等小夷辱大將軍遠諭遂相讓而罷天順改元皇上
念其父祖子孫世篤忠貞俾朝廷無西南憂乃進右都

督賜敕嘉獎賚以白金文綺明年六月九日俄以疾薨于鎮距生宣德辛亥四月十八日春秋二十有八滇南僚屬軍民父老相向而哭皆失聲上聞訃震悼罷朝一日遣進士曾瑄營葬諭祭進其弟瓚同知右軍都督府事總兵繼鎮公性端謹恬淡類儒者苞苴不及其門篤信好學尤長於詩工篆籀行草字畫遒勁可人至於揮灑山水圖畫亦臻其妙立五華書屋政暇竟日端坐其中與二三才士講論經史高下古今人物手不釋卷畫

不入內室不私近習不耽玩遊每過節令必延賓僚於所居凝清堂淨香亭諸勝處賡和宴樂有古儒將風所著詩文數千篇渾厚典雅追配古人娶鍾氏封夫人生女二俱夭從弟琮嗣封黔國公以是歲十二月十九日葬公於商山普吉村之原從吉兆也已卯冬十月殯走書至京師曰先兄不幸早亡法得樹碑神道敢請文以信天下後世予惟高皇帝創業之初其功臣蓋多矣惟昭靖王以懿親元勳奠此南服自是以來傳其子孫兄

第七人皆佩征南將軍印世守其地而又有如公之文武才行可謂不忝其家世者矣固宜永其年繁其後今乃夭而無嗣豈造物者之乖乎乃撫其槩於前而系之銘銘曰昔我高皇奄有萬方攀龍附鳳沐氏孔昌惟此滇南實居徼外平而撫之奕世其賴丕顯前烈有美嗣人英年繼鎮號令一新推髻卉裳固不向化邊陲帖然事我耕稼斷斷賊孽負險跳梁殲而俘之武功大彰何嗇其齡而絕其嗣於族則繁於才則試文武之藝希世

之華碧雞金馬同此無涯
我我翠珉永昭行實震爾百
蠻千古無斁

古
穰
集
卷
十
一

欽定四庫全書

古穰集卷十二

明 李賢 撰

神道碑銘

吏部尚書致仕贈太保謚文端王公神道碑銘
公諱直字行儉別號抑菴系出琅琊晉太傅導之後也
導輔東晉遂家金陵後數世有崇文者仕唐為吉州刺
史因家吉州又數世孫贄仕宋為戶部侍郎徙居泰和

代有顯人曾祖以道祖子興隱居不仕父伯貞仕國朝
為肇慶知府俱以公貴累贈少傅兼太子太師吏部尚
書妣皆贈一品夫人公早喪母而父以事去賴祖母李
夫人撫育自幼端重異於常兒家貧力薄刻苦讀書永
樂改元遂領鄉薦明年登進士第時太宗皇帝篤意古
學詔選進士曾祭等二十八人為翰林庶吉士俾讀中
秘書冀成遠大之器公在選中感激奮志不數年文辭
追古作者上以公卓越諸士召入內閣凡機密之政屬

執筆焉尋授翰林脩撰車駕巡幸北京仁宗為皇太子
監國留務之重選任尤嚴時翰林則留黃淮楊士奇與
公三人輔導公夙夜勤慎不懈中外咸倚重之及再幸
北京公在扈從遂與脩太祖實錄未成以憂去服闋仍
入翰林陞侍讀仁宗即位進侍讀學士宣宗為皇太子
慎選官僚首陞公右春坊右庶子仍兼侍讀學士凡經
筵講義及文武羣臣誥勅皆以屬公又兼記註至於聖
政聖訓之當書者皆錄之以備纂述進階奉議大夫宣

宗即位與脩兩朝實錄成進詹事府少詹事仍兼侍讀
學士有白金綵幣襲衣寶鏹之賚進階中順大夫今上
嗣位詔脩先朝實錄以公總裁書成進禮部左侍郎仍
兼學士賞賚如前久之以禮部缺人命公出蒞部事宗
伯胡公大喜闔部之政悉付之公處之裕然若素習者
吏部尚書郭璉去位詔以公代之命下士類皆悅進階
資善大夫歷再歲有無賴不得志者以選撥事嫁禍於
公給舍御史文章論列乃直公誣加授資德大夫正治

上卿正統己巳秋北敵犯邊車駕欲親征公獨以為不可率廷臣上疏止之不獲特命公留守京師加太子太保兼吏部尚書尋進階榮祿大夫景泰初進少傅壬申兼太子太師進階光祿大夫公累疏求退不允天順改元皇上復位圖任舊人公艱於步履不能朝謁懇乞休致并辭師傅二職詔特許之賜以璽書有忠清之操簡于朕懷之語復出白金文綺寶鏐賜之給驛舟以歸公方面脩髯器宇宏偉望之若神仙中人天性嚴重寡言

笑居家儼然及至接人和氣可掬學富才敏詩文清緻
四方求者接踵屢典春闈文衡得人最盛在翰林三十
餘年恭勤不怠如一日與王文安公齊名時稱二王又
以居第在東稱東王先生士類莫不拭目海內想其風
采及位冢宰益加廉慎時方面官罷廷臣薦舉專屬吏
部公益留意人才委任部屬凡御史出巡歸者必令報
其高下以備拔用自是四方多號得人奔競之風為之
一息居第隘陋曾不屑意一切世味安於淡薄朝廷重

公之德每優禮之免其朝謁及退休居家杜門不出日課諸孫讀書而已所著有抑菴集若干卷行於世天順六年九月二十三日以疾終於正寢享年八十有四訃聞上為之悼惜特贈太保謚文端遣官諭祭于其家復令有司營葬事公配陳氏累封一品夫人先公二年卒子男五人長曰積翰林檢討居母憂以卒次曰稹次曰穆次曰桐女三人長適梁相次適蕭稹次適袁傑孫男十人曾孫男七人稹等卜以天順七年正月六日葬于

邑之信實鄉高坪之原乃以公所為墓誌示賢請銘其神道賢從公遊最久公未嘗待以屬吏又引之同升平生之知未有過於公者謹次第其事而系之以銘銘曰國之明昌繫彼才賢有一挺生繫豈偶然侃侃王公天賦其秀有聲蔚然大江之右鑿坡鳳閣容與翔翔惟學之昌惟譽之芳遂秉鈞衡不倚不忒百司庶府位稱其德位稱其德又我烝民列聖汝嘉保傅師臣公之旋歸既祿且壽國藉著龜士仰山斗公之云亡軫我聖衷節惠

二名錫命三公有美哀榮無然愧忤銘在豐碑元老之墓

禮部尚書致仕贈太保謚忠安胡公神道碑銘
我朝名公鉅卿聰明特達者多矣若器識宏遠福壽隆
長惟武進胡公一人嗚呼休哉公諱濂字源潔別號潔
菴其先淮安宿遷人有諱藩者仕劉宋為太子左衛將
軍遷豫章數傳至諱臧者仕唐為侍御史子常州刺史
瓊生持因家於常遂為武進人持四世孫曰宿仕宋為

樞密副使宿干一世孫曰中立為常州制置中立生昭
公之高祖也曾祖庸仕元為江浙儒學提舉祖禎為常
州路醫學錄考宗仁隱居不仕皆以公貴贈光祿大夫
少傅兼太子太師禮部尚書曾祖妣章氏祖妣徐氏妣
李氏皆贈一品夫人公生而髮白彌月方黑母夢一僧
持花以遺之覺而生公居數日有僧至家索觀公見僧
即笑僧曰此吾師天池高僧後身也命我求見以笑為
誌果然聞者咸驚異之公自幼端重不好嬉戲弱冠入

邑庠洪武中領鄉薦登庚辰進士第授兵科給事中尋
遷右給事中公勤識大體士林譽之太宗文皇帝入正
大統公供職如舊永樂改元秋以奏對稱旨陞戶科都
給事中丁亥上察近侍中惟公忠實可託遂命公巡遊
天下以訪異人為名實察人心向背時御製性理大全
為善陰隲孝順事實書成俾公以此勸勵天下以故雖
窮鄉下邑軌跡無不到在湖廣間最久丙申秋還朝丁
內艱乞終制不允尋進禮部左侍郎明年往巡兩浙諸

州授嘉議大夫癸卯自均襄還朝時御駕親征北敵駐
蹕宣府公馳謁行在所上卧不出聞公至喜而起且慰
勞之曰卿馳驅良苦賜坐與語凡所歷山川道里郡邑
豐嗇民情休戚以至所聞所見保國安民之事悉為陳
說上欣然納之向所疑慮者至是皆釋比退漏下四鼓
先是仁宗皇帝為太子監國時有飛語上聞文廟屬公
往察之公至以所見七事皆誠敬孝謹密疏以聞上覽
之大悅自是不復疑仁宗嗣位特賜誥命授正議大夫

資治尹已而聞公曾有密疏疑之乃轉太子賓客兼國
子祭酒之官南京未幾閱奏章見公所上密疏深嘉其
忠方議重用之而龍馭上賓矣宣宗皇帝即位復禮部
左侍郎兼職如故洪熙乙巳冬公自南京來朝上素重
公及入見顧問良久即留任行在禮部事宣德改元春
進尚書是歲秋漢王謀叛事覺公贊上親征事平公受
賞賚甚厚復給叛者家屬四人丁未賜誥命投資善大
夫復賜近第一區於長安右門外給閹者二人戊申上

嘉公忠勤特賜銀章四其二曰文恭世家曰清和恭靖
蓋嘉羨褒美之也尋以公生辰賜宴於其第秋八月公
扈從巡邊至會州而還己酉命兼詹事府事夏五月復
扈從北巡時常民有豪橫者既抵於法悉以田宅賜公
辛亥命兼行在戶部事聖節御製詩一章賜公及蹇忠
定楊文貞文敏三公且曰朕茂膺天眷惟爾四人贊翼
之功因賜宴盡醉而罷新建禮部成命光祿設宴勳戚
公卿皆往賀公公以為盛事立石廳事之右倚任益隆

每燕見上虛心問曰卿有何言得其章奏即施行之時
有芝產於公署人以為公和氣所召今上皇帝踐祚亦
惟圖任舊人待公尤厚凡軍國重務皆與聞加授資德
大夫正治上卿每考績必有賚予甲子以年至七十上
章乞致仕上以公精力未衰慰勉留之己巳上親征北
敵命公留守京師秋八月進太子太傅階榮祿大夫景
泰初賜誥命辛未春公因災異數見乞放免以回天意
不許尋進少傅壬申兼太子太師二俸兼支公固辭一

俸癸酉復賜誥命進階光祿大夫自後每歲引年乞歸
皆不許丙子復因災變乞賜罷黜亦不許時公年八十
二忽疾作艱於步履明年皇上復位公喜不自勝扶疾
入朝而筋力不可強矣遂乞謝事且辭師傅二職上方
重用耆舊憫其老皆從之陞辭賜白金寶鏹金織襲衣
給驛舟以歸復賜璽書有卿宅心允臧處事惟慎雖經
變故無改厥常之諭歸之日鄉人老稚聚觀者以億萬計
公陳所受賜於堂感激泣下遣冢子長寧詣闕申謝上

念公歷事累朝遂官長寧為錦衣衛世襲鎮撫俾歸終
養公之弟克恭克寧克誠時年皆七十餘蒼顏白髮燕
樂於一堂遂扁曰壽愷優游桑梓者七年疾復作召諸
子前曰爾輩圖報國恩勿墜家聲遂瞑目而逝天順七
年八月八日也享年八十有九終之夕常州守卓天錫
夢公來辭已而聞終大以為異訃聞上為之震悼贈太
保謚忠安遣官諭祭於其家復令有司營葬事恩榮始
終世莫與比公為人平易寬和廉靜寡慾自奉淡薄起

居有常居官敬慎一毫不苟歷事列聖無纖毫過舉蔚
然為一代名臣立朝幾六十年薦拔士類甚多十知春
闈貢舉天下之士盡出其門平居未嘗疾言遽色雖庸
夫孺子亦知其為長者暇則手不釋卷喜為詩文晚年
譽望益尊其酬應愈劇曾不厭倦所著有芝軒集若干
卷又嘗輯錄醫藥經驗者曰衛生易簡方經進又有律
身規鑑俱行於世公配范氏早卒累贈夫人繼張氏累
封夫人子男四人長曰拱即長寧居母喪廬墓有司聞

於朝旌其門曰孝子次曰旡以武舉得官沒於王事次
曰礪錦衣衛指揮僉事次曰洞女三人長贅林圮次適
成國公朱儀次適武陽侯薛琮孫男一人曾孫男一人
銘曰大明盛時有臣胡公從容其間以篤其忠始為夕
郎乃教胄子輿論攸歸多士咸喜作賓春宮遂長春官
列聖倚之四海又安國之老成進位師傅溫恭維人翊
我皇度公在朝廷六十春秋祿位優游莫之匹休公身
雖亡中有不死懿行崇功昭彼信史皇惜耆英曠典是

承隧道有碑儒臣刻銘

工部尚書謹身殿大學士兼東閣大學士致仕

高公神道碑銘

公諱毅字世用姓高氏其先世居河南之懷慶有仕宋者從高宗南渡徙維揚今為高郵興化人曾祖諱明祖諱椿父諱焯俱以公貴累贈少保兼太子太傅工部尚書東閣大學士曾祖妣劉氏祖妣王氏妣黃氏俱累贈一品夫人高自上世以儒業相傳至椿當元末避兵姑

蘇恐廢先業有子四人皆令從事詩書洪武初復歸維揚始占籍於興化四子業皆有成其季公之父也尤長於詩有書數千卷不樂仕進隱居教授而鄉之後進多從之游公自幼承家訓舉止如老成人父竒之甫十歲乃遣入邑庠即能奮力於學弱冠遂領鄉薦登永樂乙未進士選入翰林為庶吉士辛丑授中書舍人甲辰陞左春坊左司直郎洪熙改元受敕階承務郎未幾以學行獨優陞翰林侍講丁外艱服除還任宣德甲寅主考

順天府鄉試人服其公正統改元春上初御經筵少傅
楊士奇等上言經筵講官必得學問貫通言行端正者
以供其職遂薦公與苗衷馬愉曹鼎四人專侍講讀賜
三品章服公每進講敷衍詳明聞者嘆服戊午預脩宣
廟實錄成進侍講學士甲子復主考應天府鄉試士無
間言乙丑進工部右侍郎兼侍講學士入內閣知制誥
丁卯進階通議大夫己巳秋聖駕北征命公留守尋進工
部尚書兼翰林學士時景泰初邊峰告警軍務方嚴選

使邊者得中書舍人趙榮陞大理少卿公嘉榮之奮忠
即解所束金帶與之景泰初聖駕自北還議奉迎禮公
欲從厚衆涉疑未定有千戶龔遂榮投書於公言奉迎
當重之意公即袖其書以進且曰武夫尚知此禮况儒
臣乎已而朝廷以遂榮非分得譴比聖駕至百官郊迎
公復上章以伸前議無所顧忌聞者義之辛未朝廷以
公望重進少保仍以尚書兼東閣大學士壬申兼太子
太傅公懇辭不允尋賜階榮祿大夫甲戌南京災朝廷

念祖宗陵寢所在以公大臣中清慎者特命往祭事竣錄被災者千餘家悉發廩賑之歸奏稱旨是歲冬給事中有忤執政者執政欲害之乃諷御史劾其私而羅織其罪公獨持正議卒從輕典士論韙之乙亥星變疊見公上疏謂臣濫居保傅不能盡匡輔之道宜譴罷以謝天意不允丙子寰宇通志書成進謹身殿大學士是歲秋順天府鄉試太常少卿兼翰林侍讀劉儼為考官有二執政以子入試不中交章奏儼去取不公欲置於法乞詔

翰林及六科十三道覆考公時以疾不出一聞此事即
強起預考畢毅然入言曰大臣子與寒士並進已不可
况又不安於命欲殺考官可乎由是儼得釋公之名益
振而拂其意者銜之公屢求退避朝廷重公忠直不允
天順改元皇上復位首召公慰諭而留之其餘誅斥殆
盡公即上疏辭保傅二職時機務填委公以衰老弗堪
懇乞骸骨上以公舊人方隆倚任然憫其老且重違公
意特允所請賜白金楮幣織金襲衣給驛舟送歸其鄉

復賜勅諭有曰日與親戚故舊徜徉邱園展契濶之深
懷道朝廷之盛事清風高致足以勵廉而革貪風德雅
望足以敷化而導俗則卿亦永有終譽焉士林以為榮
越四年庚辰忽疾作以正月十日終於正寢距生洪武
辛未三月十日享年七十娶郭氏累封一品夫人先公
卒生女一適中書舍人黃清側室杜氏生子一曰恒為邑
庠生女一周氏生子一曰岡劉氏生子一曰岐俱幼上聞
訃嗟悼遣官諭祭於其家公天資簡重操履清介而交

人不泛視義所在勇於必為雖違衆不恤也在位論薦
多號得人可謂慥慥乎篤實之君子矣所著有育齋集
八十卷垣以侍讀學士錢君溥之狀來請銘銘曰白葦
黃茅易脆而朽松栢挺生何獨能久抑根之固越心之
堅蔚然蒼翠何千萬年豪傑之生有類於此相彼高公
實同容止早登仕路厥聲孔揚英華之發斐然成章翰
苑優游帝資啓沃文衡兩持士論咸服乃位保傅乃參
化機錦袍玉帶金馬彤闈見義必為莫之能禦直道古

心慨然自許保全晚節宸眷優優容與桑梓胡不少留
亦既蓋棺名著天壤卹典之褒百世之仰有銘在石懿
行輝光嗚呼泉室哲人之藏

資政大夫都察院左都御史贈少保謚莊愍寇
公神道碑銘

都御史乃糾慝繩違之任總憲度肅百僚權奸之所最
忌者寇公居是職五年矣持法嚴明見逆賊曹欽父子
兄弟恣意妄為乃率御史劾之欽等遂行反逆首害公

賊雖誅滅公命殞矣朝廷震悼特贈少保謚莊愍加賜
賻儀遣官諭祭令有司為營安葬蓋深念任事之臣遭
此凶禍而恤典宜厚也其子林泣且告曰先人不幸弗
獲全歸而墓石之銘不可以無託敢固以請辭弗釋按
知府張祝狀公諱深字文淵其先山西渾源人世多顯
官曾祖廣任元為提舉有才行見寵於世祖為擇宣寧
縣黑虎鎮之乾河里俾居之國朝洪武初以閩右給省
檄過保定唐縣止連頤庄見其風土之美因占籍焉今

為保定人祖彥和父禮俱以公貴贈資善大夫都察院左都御史祖妣宋氏妣李氏俱贈夫人公自幼警發永樂中為郡庠生上言時務朝廷竒其人召入曹監時山東要路軍需錢穀有弊政遣中貴人陳保孫往廉之求國子生精敏者同事得公甚喜宣德初擢刑部主事有勤能之譽尋陞員外郎丁外艱服闋復任益盡心刑獄凡疑獄人不能辯者必屬公正統甲子用執政薦陞山西按察副使時天久不雨朝廷念刑獄有冤抑者特委

公錄山西諸郡大辟囚公察其情可矜疑者五十餘人
悉奏釋之又上邊務數十事多見采納丙寅四川松潘
夷不靖守臣請出師勦之朝廷念撫治者非其人乃命
廷臣推有風力者僉謂公可即日召至京師拜都察院
右僉都御史以往遂破賊寨擒其渠魁送京師諸番虜
伏獻盔甲刀劍三千童男三十七人駿馬四百餘疋繼
後入貢不絕公暇則撫恤士卒相地要害築關堡城池
六十處道路險峻者咸削平之以便儲運番夷酋長或

率其黨來見公宣布朝廷威德且諭以享福之道莫不感化地方底寧朝廷嘉公之能進左副都御史加食二品祿綵幣白金之賚甚厚一日得母報平安書潸然出涕曰老母在堂久曠定省安能為懷即上章懇乞終養朝廷優詔慰而留之景泰辛未召公還特加獎勞番人乞留者十有七奏不從未踰月提督遼東軍務缺人廷議復屬公遂假以便宜之權賜白金綵幣慰勉以往公至遼左威名益振乃積糧練兵畫防備守禦之計中外

守臣咸敬畏之癸酉海賊李福惠挾妖術以惑山東之
民聚衆萬人公得報略不改容乃親率數百騎直抵海
州遣都指揮周英授以成算捕之遂獲千餘人公詰其
造亂之由得首惡者二十餘人械至京師餘皆釋之景
泰甲戌北敵入境會總戎得公所議巡邊之策因其勢
便斬敵首七十餘級獲馬六百餘匹公在邊歲久思親
益切或與同事者言及母老輒流涕終日不食累上章
乞歸不允丙子得還京議邊事時母年九十有四已感

風疾曰得見吾兒即瞑目矣公悲泣懇求歸省至家母一見而逝公哀毀踰禮朝廷起公復任公乞終制章凡三上不允天順改元皇上復位乃許公終制時臺長缺人思臣僚中老成剛勁無踰公者復起公視事進左都御史公威望日隆百僚敬憚上深嘉之寵賚優厚嘗召公咨訪政務但加老字於姓上呼之而不名蓋重公也公天性至孝雖居顯仕惟以不得養親為歉諳於世故凡本朝舊典歷歷能記聽獄果斷人服其明未老即以

家事付林綜理曰吾受朝廷重託惟職務是盡餘不恤也生於洪武癸酉五月七日沒於天順辛巳七月二日得壽六十有二配李氏先卒累贈夫人生子男三長即林國子生次彬次桂早卒女三長適保定中衛千戶劉琮次適旗手衛指揮使高裕次幼在室卜以是年十一月二十四日與夫人合葬於連頤西岡之陽銘曰惟錐在囊穎脫斯見惟楠在壑昂霄可羨彼物且然而况於人惟人之傑衆孰與倫侃侃寇公早有負敷歷仕途

才智稱首兩鎮邊陲邊塵不揚入總臺憲大振朝綱賊
奸忌之竟為所害恤典有加遺澤未艾惟孝與忠在公
則崇有志不餒名位攸隆墓碑我我昭此行實永閟泉
臺曷有其極

資政大夫戶部尚書謚恭定年公神道碑銘

天順庚辰戶部尚書缺人皇上以年公富可當其任有
惡其執法者沮之乃屬吏部改議上曰掌國計者正用
執法之人卒用公命下朝紳皆悅已而在任公勤慎密

士望益重一旦以疾卒無有不悼惜者其子請銘其神
道之碑按侍郎薛君狀公字大有別號謙齋姓嚴氏上
世莫詳所居曾祖孟陽任元為萬戶守滁陽因家全椒
元季兵亂子孫流徙鳳陽之懷遠洪武初附版籍悞以
嚴為年遂因之祖遇春父景和俱以公貴贈資政大夫
戶部尚書祖妣朱氏妣邵氏俱贈夫人公甫十歲即入
邑庠為弟子員明敏端重師友咸器異之弱冠領永樂
丁酉鄉薦明年以乙榜教諭濟南之德平年雖少而教

規甚嚴諸生多所造就秩滿以績最擢吏科給事中兼署刑科糾正違失務存大體宣德乙卯吏部薦陞光祿少卿宣廟欲大用之乃奏留不下久之特陞陝西布政司右叅政至任即巡歷郡邑察民隱革奸弊興學勸農尤嫉賊吏貪墨者聞風即托故解去鎮守憲臣獨加禮焉或指畫未宜聞公言即止初三邊士馬衆盛供費浩繁民皆疲於遠輸而郡邑豪猾之徒因緣為奸邊儲多空乏朝廷深以為慮乃屬公總之公量地里之遠近接收

支之遲速定其徵科防其出入立法甚嚴夙弊盡革民
不告勞而邊廩實矣正統甲子陞河南右布政使惠政
及民愈廣時鄰省飢民流聚南陽陳州諸處無慮十數
萬剽掠居民有司莫能制公往撫諭乃分散安輯而賑
恤之衆皆感公之德願為編氓已已轉左布政使未幾
北敵入寇雲中烽火通於京畿軍民走避道阻糧絕朝
廷憂之以公有謀為特委督運糧餉八萬石濟邊吏民
聞公號令皆冒險而進無後期者邊餉以充明年用邊

將論奏進都察院左副都御史提督大同軍務兼理邊
儲時軍民瘡痍未復室家離散呻吟之聲不絕公招亡
撫存舉廢改革科徵抑豪橫廣屯田軍民始有更生之
望初倉庫所儲多為勢要侵攷公至悉追復之由是軍
旅數興錢穀不乏時北征大將而下多納賂冒功公至
悉核實不錄故爵賞無濫及者景泰乙亥丁外艱朝廷
以邊警方急奪哀視事公懇乞終制不允天順改元將
臣石彪因私怨以危事中公逮繫於京賴英廟保全乃

令致仕不數月即起為南京兵部右侍郎尋轉戶部右侍郎巡撫山東隨復左副都御史公按行青齊諸郡官吏畏服奸豪屏迹有番人居東昌者多頑獷弗率其首羅姓者尤為桀黠公慮為患乃言於朝因其來京留之以消其不逞之謀庚辰春召為戶部尚書英廟知公忠直禮遇優厚公益悲懋夙夜不懈以國計為已任然處之以靜不動聲色而事無不集癸未賜誥命詞極褒獎甲申春公以陝西累年用兵而督饟道者多不得人乃

薦三人為藩司郡守使理其事吏部以公為侵官公上
疏極論大臣薦賢為國之道且以年至七十懇乞致仕
上初臨御以公舊臣慰勉之使復任忽得瘡疾且劇上
命醫往視竟不起深為之震悼輟視朝一日賜謚恭定
復遣官諭祭令有司治葬事朝之公卿大夫莫不弔哭
盡哀公為人剛正言不輕發廉靜寡慾遇事敢為臨利
害不少變氣節才識世不易得生於洪武乙亥十二月
七日卒於天順甲申四月十六日享年七十配蘇氏贈

夫人早卒子男四人長曰茂早卒次曰芳國子生次曰
英次曰華女四人何璟盧剛周縉薛希良其壻也孫男
八人卜以是歲某月某日歸葬於先塋之次銘曰天順
人才一時極盛有偉年公尤號敬正既司國計法不可
搖我冠秉笏挺然孤標有偉年公敷歷最久始終不渝
惟道是守屢摧不折勵操愈剛儼如蒼檜任彼冰霜有
偉年公一代無幾星鳳之祥海內咸視皇恤者舊恩禮
是優恭定之名百世之休形歸泉臺無虞有妥史臣作

銘刻石道左

翰林院學士奉政大夫贈禮部左侍郎謚文懿

呂公神道碑銘

公諱原字逢原姓呂氏浙之嘉興秀水人自幼穎敏九歲能通孝經小學稍長為文輒驚動長者時父兄俱為教官識者曰此子殆穎脫而出者也未幾父兄俱卒于景州公尚未成童孤貧不能歸喪或諷以邊俗焚之者公潸然出涕不從遂厝州城之東曰他日有力必歸之

也年及弱冠乃奉其母歸嘉興故無田宅假館以養母
力學不輟清苦之志愈堅郡守黃懋廉知之乃延為子
弟師尋俾充邑庠生公亦自奮大肆力於經史正統辛
酉遂魁鄉薦明年中禮部會試廷對賜進士及第第二人
擢翰林編脩得入祕閣讀所未見書其學益富癸亥與
脩五倫書丁卯朝廷思用奇才乃簡狀元劉儼等十人
進學東閣入侍經筵公居其一景泰初遣祭蜀王往還
萬里間凡有饋遺一毫不取未幾充經筵講官辛未進


待講壬申夏以右春坊右中允兼侍講秋九月進侍講
學士仍兼中允癸酉與脩歷代君鑑秋八月主順天府
鄉試己亥與脩寰宇通志明年書成進右春坊大學士
兼侍講每書成進講輒有寶鏹白金文綺之賚天順改
元皇上復位轉通政司右叅議仍兼侍講春三月主禮
部會試夏六月召入內閣知制誥尋轉翰林學士庚辰
春主禮部會試尋總裁大明一統志凡金帶玉杯梭服
貂帽便蕃之賚歲無虛月公夙夜感激思盡論思之職

時母老病在牀公躬調湯藥憂形於色久而不愈壬午
秋八月母卒公哀毀踰禮啓父櫬歸而合葬之詔有司
營葬公襄事即還朝懇乞終制不允抵家未及窆期忽
以風疾不起在是歲十一月二十七日距生永樂戊戌
六月十八日得年四十有五訃聞上悼嘆不已特贈禮
部右侍郎謚文懿命工部為營葬事遣官諭祭於其家
仍命其子憲為國子生皆異數也公天性孝友事母得
其歡心撫育兄子皆底成立宗族中有困乏者必推所

有以調之過人之危殆者濟之惟恐不及也歲時賞賚奉母之餘輒分遺鄉黨僚友而自奉甚儉為人沈毅有醞藉悃悞無華內端外和與物無競處已待人不立崖岬事有不可則據理諍之未嘗諛言媚色以徇人取悅三為主考取士得人最多其教人也誠切懇到善於警發故四方之士及門者衆其學造詣益深作為文章議論超越皆有根據而理趣充然詩有典則音律渾厚無纖巧靡麗態初入翰林時楊文貞文定諸公咸器重之

知其所就必遠大也及入內閣與大議所見出人意表而為民之心尤切天下有陰受其賜者矣士望方殷冀必久於其位用極康濟之功而天不假年可勝痛哉公之先世多顯於宋其故居有稱為呂家府者高祖茂卿任元為提舉曾祖仲雄祖伯誠俱隱德不仕考嗣芳永樂中領鄉薦為山西萬泉教諭累贈翰林侍講學士兼春坊中允母顧氏累封太宜人兄本亦領鄉薦為景州訓導故萬泉就養而終於此公亦流寓者久之配徐氏

累封宜人子男二長即憲次日愆早卒女二俱幼所著
有介軒集若干卷藏於家嗚呼公與予同事者六年益
端謹篤實之士也世何可多得哉今其已矣可不銘諸
銘曰浙水之彥代有其人呂氏一族罕與之倫自宋以
來至公再顯卓然奮興斯慶之衍儒業相傳自其父兄
公克振之以大厥聲遭遇之隆千載不偶事業文章世
豈多有冥冥造物胡不假年乘除之數率由自然曠典
是承賁於鄉土生榮死哀昭示終古



欽定四庫全書

古樓集

卷

古穰集卷十二